

# **ESTATUTOS DO CLUB DE TIRO CON ARCO DE TEO**



## **CAPÍTULO I** **NORMAS XERAIS**

### **Artigo 1.- O CLUB DE TIRO CON ARCO DE TEO**

é unha Asociación privada con personalidade xurídica e capacidade de obrar, integrada por persoas físicas, que ten como obxecto exclusivo ou principal a práctica da actividade física e deportiva polos asociados, así como a participación en actividades e competicións oficiais, sen ánimo de lucro.

### **Artigo 2.- O CLUB DE TIRO CON ARCO DE TEO**

practicará como principal modalidade deportiva a de TIRO CON ARCO, e solicitará a ratificación dos Estatutos e a inscrición no Rexistro de Asociacións Deportivas e Deportistas de Galicia, de conformidade coa Lei Xeral do Deporte de Galicia.

### **Artigo 3.- O domicilio Social fixase en**

Edificio O Grilo, Portal 2, Baixo A, Cacheiras

CP. 15886

concello de TEO

provincia de A CORUÑA

telefono 981 80 59 45

Correo electrónico arcoteo@gmail.com

O/A Presidente/a, cando as circunstancias o aconsellen, poderá acordar o cambio do domicilio social dentro da mesma localidade. Para o traslado do domicilio a outra localidade, que deberá ser sempre dentro do territorio da Comunidade Autónoma de Galicia, será necesario o acordo maioritario da Asemblea Xeral Extraordinaria.

En ambos os casos, o traslado de domicilio social non implicará modificación estatutaria, e terá de ser notificado aos socios e ao Rexistro de Asociacións Deportivas e Deportistas de Galicia.

## **CAPÍTULO II** **CLASES DE SOCIOS. ADMISIÓN. DEREITOS E OBRIGACIÓNS**

**Artigo 4.-** O número de socios será ilimitado. A Asemblea Xeral poderá suspender, non obstante, a admisión de novos socios cando así o esixan razóns de aforo ou capacidade física das instalacións. Os socios poderán ser das seguintes clases: de número, honorarios, aspirantes e familiares.

**Artigo 5.-** Son socios de número todas as persoas maiores de idade que satisfagan a cota social establecida pola Asemblea Xeral.

Os menores de 18 anos clasificaranse como socios aspirantes, tendo dereito ao uso das instalacións sociais mediante a cota que se fixe e pasarán automaticamente a ser socios de número ao cumpriren a maioría de idade.

Serán socios honorarios aquelas persoas ás que a Asemblea Xeral confira esta distinción e terán un posto de preferencia nos actos oficiais da sociedade.

Son socios familiares todas aquelas persoas que dependan economicamente dun socio de número e convivan con el no mesmo domicilio.



#### Artigo 6.-

1.- Os socios de número terán os seguintes dereitos:

- a) Contribuír ao cumprimento dos fins específicos da asociación.
- b) Esixir que a Asociación se axuste ao disposto na normativa autonómica deportiva e ao establecido no presente Estatuto.
- c) Separarse libremente da Asociación.
- d) Coñecer as actividades da Asociación e examinar a súa documentación, previa petición razoada ao/a Presidente/a.
- e) Expor libremente as súas opinións no seo da Asociación.
- f) Ser elector/a e elixible para os órganos de representación e goberno da Asociación, sempre que teña plena capacidade de obrar.

2.- Son obrigacións dos socios de número:

- a) Aboar as cotas que esixa a Asemblea Xeral.
- b) Contribuír ao sostemento e difusión do deporte ou modalidades deportivas.
- c) Acatar cantas disposicións dicte a Asemblea Xeral, a Xunta Directiva ou o/a Presidente/a, para o bo goberno da sociedade.

3.- Os socios aspirantes terán dereito a aproveitarse dos servizos e instalacións sociais da Asociación.

4.- Os familiares dos socios de número terán dereito a aproveitarse daqueles servizos e instalacións que se determinen, previo pago da cota fixada.

Artigo 7.- Para ser admitido como socio, en calquera das súas modalidades, será necesario:

- Ter a idade sinalada para cada unha delas.
- Solicitude por escrito dirixida ao/a Presidente/a.
- Satisfacer a cota de ingreso correspondente.

Artigo 8.- A condición de socio pérdese:

- Por vontade propia.
- Por falta de pago das cotas sociais durante tres meses consecutivos, previo requirimento de pago, e consecuente Resolución do/a Presidente/a.
- Por acordo, no seu caso, do/a Presidente/a, fundado en faltas de carácter grave, previa audiencia do interesado, que deberá de ser ratificado na primeira asemblea xeral que se celebre.
- Por calquera outra causa establecida na lexislación vixente.

### **CAPÍTULO III** **ÓRGANOS DE REPRESENTACIÓN E GOBERNO**

Artigo 9.- Son órganos de representación e goberno do Club a Asemblea Xeral e o/a Presidente/a.

Artigo 10.- O/A Presidente/a é o órgano executivo do Club, posúe a representación legal, convoca e preside os órganos de representación e goberno, executando os acordos destes.

O cargo de Presidente/a é a título gratuito e carente de interese nos resultados económicos da explotación, por si mesmo ou a través de persoa interposta.

Será elixido mediante sufraxio libre, directo, igual e secreto por e entre os membros da Asemblea Xeral, cada 4 anos.

Artigo 11.- O/A Presidente/a cesará por:

- a) Transcorrer o prazo polo que foi elixido/a.





- b) *Demisión.*
- c) *Falecemento ou incapacidade física ou psíquica para continuar no exercicio do seu cargo.*
- d) *Aprobación dunha moción de censura pola Asemblea Xeral.*
- e) *Inhabilitación por sentenza xudicial firme ou sanción deportiva.*

#### Artigo 12.-

1.- *Como órgano complementario dos de goberno e representación haberá unha Xunta Directiva que actuará como órgano colexiado de xestión do Club, e exercerá as funcións que este estatuto lle confire.*

2.- *Os membros da Xunta Directiva serán designados e revocados libremente polo presidente, debendo dar conta diso na primeira Asemblea Xeral que se celebre. Da mesma formarán parte un secretario e un tesoureiro. Todos os cargos serán gratuitos e carecen de interese nos resultados económicos do Club por si mesmos ou persoa interposta.*

#### Artigo 13.-

1.- *A Xunta Directiva quedará validamente constituída en primeira convocatoria cando concorran a ela a maioría dos seus membros. En segunda convocatoria será suficiente a concorrencia, polo menos, de tres dos seus membros, e, en todo caso, do/a Presidente/a.*

2.- *A Xunta Directiva convocarase polo/a Presidente/a con dous días de antelación como mínimo á data de celebración.*

*A Xunta Directiva quedará tamén validamente constituída cando estean presentes todos os seus membros, aínda que non tivese mediado convocatoria previa.*

3.- *En especial corresponde á Xunta Directiva:*

- a) *Dirixir a xestión do Club, velando polo cumprimento do seu obxecto social.*
- b) *Formular o inventario, memoria e presuposto anual, que se someterá a aprobación da Asemblea Xeral.*
- c) *Aplicar todas as iniciativas deportivas, económicas e administrativas precisas para o fomento e desenvolvemento do deporte dentro do Club.*

Artigo 14.- *O/A Secretario/a da Xunta Directiva coidará do arquivo e da documentación, redactará cantos documentos afecten á marcha administrativa da Asociación e levará o Libro de rexistro de socios e o Libro de Actas.*

#### Artigo 15.-

1.- *O/A Tesoureiro/a da Xunta Directiva será o depositario da Asociación, asinará os recibos, autorizará os pagos e levará os Libros de Contabilidade.*

2.- *Será obriga do/a Tesoureiro/a formalizar, durante o primeiro mes de cada ano, un balance de situación e as contas de ingresos e gastos, que se porán en coñecemento de todos os asociados.*

#### Artigo 16.-

1.- *A Asemblea Xeral é o órgano supremo do goberno do Club e estará integrada por todos os seus socios de número.*

2.- *As Asembleas Xerais, tanto Ordinarias como Extraordinarias, quedarán validamente constituídas en primeira convocatoria cando concorran a ela, presentes ou representados, a maioría dos seus asociados. En segunda e última convocatoria, media hora máis tarde, quedará constituída calquera que sexa o número de*

membros presentes. Entre a data de convocatoria e o día sinalado para a súa celebración *terán de mediar, como mínimo, dez días naturais e non poderá transcorrer máis de 20.*



Artigo 17.- A Asemblea Xeral convocarase polo/a Presidente/a a iniciativa propia ou do vintecinco por cento, polo menos, dos socios de número.

1.- A Asemblea Xeral reunirase con carácter ordinario, previa convocatoria do/a Presidente/a, polo menos unha vez ao ano para tratar das seguintes cuestións:

a) Memoria, liquidación do presuposto, balance do exercicio, rendición de contas e aprobación, se procede.

b) Presuposto para o seguinte exercicio.

c) Proxecto e propostas do/a Presidente/a ou da Xunta Directiva.

d) Proposicións que formulen os socios e que terán de ir asinadas polo menos polo cinco por cento dos mesmos.

2. - Terá de se celebrar Asemblea Xeral extraordinaria para a modificación de Estatutos, elección do/a Presidente/a, toma de cartos a préstamo, emisión de títulos representativos de débeda ou de parte alicuota patrimonial, alleamento de bens inmoables e fixación de cotas dos socios, e calquera outro acordo previsto nestes estatutos ou que se estime oportuno polo/a Presidente/a ou proceda legalmente.

Artigo 18.- Os acoraos da Asemblea Xeral e da Xunta Directiva adoptaranse por maioría simple dos presentes, serán vinculantes e de obrigado cumprimento e terán forza executiva a partir da data da súa adopción, sen prexuízo, por razón da materia, da posibilidade da súa impugnación perante os órganos competentes e da Federación Galega Deportiva da modalidade ou perante o Comité Galego de Xustiza Deportiva.

#### **CAPÍTULO IV** **RÉXIME DOCUMENTAL**

Artigo 19.- O réxime documental do Club constará dos seguintes libros: Rexistro de Socios, de Actas e Contables.

Artigo 20.- No libro de Rexistro de Socios terán que constar os nomes e apelidos dos socios de número, o seu Documento Nacional de Identidade e, no seu caso, os cargos de representación, goberno e administración que exerzan no Club. Tamén se han especificar as datas de altas e baixas, e as de toma de posesión e cese nos cargos aludidos.

Artigo 21.- No libro de Actas consignaranse as reunións que celebre a Asemblea Xeral e a Xunta Directiva, con expresión da data, asistentes, asuntos tratados e acordos adoptados. As Actas terán que estar asinadas, en todo caso, polo/a Presidente/a e o/a Secretario/a.

Artigo 22.- Nos Libros de Contabilidade figurarán tanto o patrimonio como os dereitos e obrigacións, e ingresos e gastos do Club, debéndose precisar a procedencia daqueles e a inversión ou destino destes.

#### **CAPÍTULO V** **RÉXIME DISCIPLINARIO**

Artigo 23.- Os órganos e socios do Club estarán sometidos ao regulamento disciplinario do Club e ao disposto no Título VII da Lei 11/1997 Xeral do Deporte de Galicia e normativa do seu desenvolvemento.



Artigo 24.- Así mesmo, o/a Presidente/a e os membros da Xunta Directiva responderán fronte os socios, o Club ou terceiros dos prexuízos que ocasionaren por culpa ou negligencia grave, de conformidade coa regulamentación propia do Club e o Ordenamento Xurídico vixente.



## **CAPÍTULO VI** **RÉXIME ECONÓMICO-FINANCIERO E PATRIMONIAL**

### Artigo 25.-

1.- No momento da creación do Club, o patrimonio fundacional é: **50 €** e non dispón de instalacións nin locais propios

2.- No futuro o patrimonio do Club estará integrado por:

- a) As aportacións económicas dos socios que aprobe a Asemblea Xeral.
- b) As doazóns e subvencións que reciba.
- c) Os resultados económicos que poden producir as manifestacións físico-deportivas que organice a entidade.
- d) As rendas, froitos e intereses do seu patrimonio.

Queda expresamente excluído como fin do Club o ánimo de lucro e a totalidade de seus ingresos e beneficios aplicaranse ao cumprimento dos seus fins sociais.

Artigo 26.- O Club poderá gravar e allear bens, mobles e inmobles, tomar diñeiro a préstamo e emitir títulos transmisibles representativos de débeda ou parte alicuota patrimonial, sempre que cumpran os seguintes requisitos:

1.- Que se autoricen tales operacións por maioría de dous tercios dos socios presentes ou representados na Asemblea Xeral Extraordinaria.

2.- Que ditos actos non comprometan de modo irreversible o patrimonio da Entidade ou a actividade físico-deportiva que constitúa o seu obxecto social. Para a adecuada xustificación deste extremo poderase esixir, sempre que o soliciten como mínimo o cinco por cento dos socios de número, o oportuno dictame económico-actuarial.

3.- Cando se trate de gravar ou allear bens, mobles e inmobles, que foran financiados, en todo ou parte, con Fondos Públicos da Comunidade Autónoma, será preceptiva a autorización previa do órgano competente da Xunta de Galicia.

Artigo 27.- O Club poderá emitir títulos de débeda ou de parte alicuota patrimonial, que serán nominativos.

Os títulos inscribíranse nun libro que levará ó efecto o Club, no que se anotarán as sucesivas transferencias.

En todos os títulos constará o valor nominal, a data de emisión, e, no seu caso, o interese e prazo de amortización.

Artigo 28.- Os títulos de débeda só se poderan subscribir polos asociados, e a súa posesión non conferirá dereito algún especial ós socios, agás a percepción dos intereses establecidos conforme á lexislación vixente.

Artigo 29.- Os títulos de parte alicuota patrimonial han ser, asemade, subscritos polos asociados. En ningún caso estes títulos darán dereito á percepción de dividendos ou beneficios.

Artigo 30.- Os títulos de débeda e parte alicuota patrimonial serán transferidos unicamente entre os que teñan a condición de socios.

## **CAPÍTULO VII** **REFORMA DOS ESTATUTOS E DISOLUCIÓN DO CLUB**

Artigo 31.- Os presentes Estatutos só se poderán modificar, reformar ou derogar, por acordo da Asemblea Xeral Extraordinaria convocada a tal efecto, mediante votación favorable dos dous tercios dos socios de número asistentes.

A reforma destes estatutos seguirá, con respecto ó Rexistro de Asociacións Deportivas e Deportistas de Galicia, os mesmos trámites administrativos que para a súa inscrición.

Artigo 32.- O Club extinguirase ou disolverase por:

- a) Acordo de dous tercios dos socios en Asemblea Xeral Extraordinaria, convocada ao efecto.
- b) Sentencia xudicial
- c) Outras causas legalmente determinadas.

En todo caso haberá de ser notificado ao Rexistro de Asociacións Deportivas e Deportistas de Galicia.

Artigo 33.- Disolto o Club, o remanente do seu patrimonio social, se houberse, aplicarase a fins análogos de carácter deportivo, ben por acordo previo da Asemblea Xeral ou subsidiariamente polo órgano competente en materia de deporte da Xunta de Galicia.

Asdo:

DILIXENCIA.- Esténdoa para facer constar que os presentes Estatutos do club DE TIRO CON ARCO DE TEO foron ratificados e inscritos co n.º C-10438 no Rexistro de Asociacións Deportivas e Deportistas de Galicia, de conformidade co disposto na Lei 11/1997, de 22 de Agosto, xeral do deporte de Galicia (DOG 4-09-97).  
13 de abril de 20 10  
O FUNCIONARIO.

